

SAKSFRAMLEGG

Sakshandsamar: Inger Moe
Arkivsaksnr.: 17/538

Arkiv: K12 &30

Forvaltningsplan for Luster Allmenning naturreservat, framlegg slutthandsaming

Rådmannen si tilråding:

Plan- og forvaltningsstyret rår til at kommunestyret gjer slikt vedtak:

I medhald av verneforskrifta for Luster Allmenning naturreservat § 7 stadfestar Luster kommunestyre forvaltningsplanen, datert 28.5.2017, og sender han til Fylkesmannen i Sogn og Fjordane for endeleg godkjenning.

På grunnlag av innspel er avsnitt 6.3, som omhandler kulturminne, omskrive. Med dette skal registreringa av kulturminne også omfatta ei skildring/tilstandsvurdering i tillegg til fotodokumentasjon og kartfesting som låg inne i høyringsframlegget. Resultata kan eventuelt lastast opp i basen «kulturminnesøk».

I tillegg er det lagt til eit kart som syner utbreiinga av gran (vedlegg 3) basert på SNO sin rapport frå mars 2017.

Saksutgreiing:

Dokument til saka:

Planframlegg

Kulturminnefagleg fråsegn frå Sogn og Fjordane fylkeskommune

Rapport om kartlegging av gran i Luster Allmenning naturreservat, 9. mars 2017

Samandrag:

Forvaltningsplan for Luster Allmenning naturreservat har vore ute til offentleg høyring. Etter innspel frå Sogn og Fjordane fylkeskommune gjer rådmannen framlegg om ei omskriving i avsnittet som omhandlar kulturminne. I tillegg er det lagt inn eit kartvedlegg som syner utbreiinga av gran i reservatet. Med desse justeringane meiner rådmannen planen er klar til slutthandsaming hjå kommunestyret, og deretter endeleg godkjenning hjå fylkesmannen.

Utval som har vedtaksmynne:

Kommunestyret handsamar planen før endeleg godkjenning av Fylkesmannen i Sogn og Fjordane.

Mynde er gjeve i denne forskrifta: *Forskrift om Verneplan for skog, vedlegg 4, Luster Allmenning naturreservat, Luster kommune, Sogn og Fjordane av 09. februar 2005 nr.975 (verneforskrifta)*

Mynde til utvalet er gjeve i følgjande lov, forskrift eller delegeringsmynde:

Om reservatet og planen:

Luster Allmenning naturreservat vart verna i 2005, som del av ein større verneplan for skog. Skogateigen, ein granførekomst som ligg i allmenningen, hadde vore verna allereie sidan 1914, som Noregs første naturreservat.

Føremålet med vernet er å ta vare på ei større samanhengande, skogkledd fjordside tilnærma urørt av moderne tekniske inngrep, med heile mangfaldet av naturtypar, økosystem, artar og naturlege, økologiske prosessar. I tillegg har området stor vitskapleg og biologisk verdi som samanhengande stort skogområde med sjeldsynte botaniske og ornitologiske førekommstar, og som studieområde for naturleg granskog i mogleg spreiing.

Ressursane i Allmenningen er lite nytta fordi området ligg svært avsides, men det finst brukarinteresser knytte til jakt, friluftsliv og litt forsking. Planen legg heller ikkje opp til særleg tilrettelegging for å trekka folk til området.

Luster kommune har hatt forvaltningsansvaret for reservatet sidan det vart oppretta, og utfører all sakshandsaming, offentleg tilrettelegging/info og ivaretaking av verneverdiane elles med hjelp frå lokalt naturoppsyn. I forskrifta heiter det at det *kan* utarbeidast forvaltningsplan. Dei seinare åra har Miljødirektoratet lagt stadig meir opp til at alle verneområde *skal* ha ein slik plan, noko som mellom anna gjenspeglar seg i form av vilkår for å søkja tilskot. I nyare verneforskrifter er ordet *kan* bytt ut med *skal*.

I høyringsbrevet inviterte kommunen interessentane til å mælda frå om nokon ynskte synfaring eller møte. Det var det ingen som gjorde.

Forvaltninga dei neste 10 åra

Måla i planen er hovudsakleg direkte knytte til føremålsparagrafen i verneforskrifta. Den gamle skogateigen er sentral, men det er også viktig å ta vare på andre skogsfunn og gradientane frå fjord til fjell. Innplanta gran som spreier seg inn i reservatet er ei utfordring Allmenningen deler med dei fleste naturreservat på Vestlandet.

Meir detaljerte mål, såkalla bevaringsmål, skal ikkje formulerast i planen, men leggjast inn i NatStat, som er eit eige system som Miljødirektoratet har utarbeidd til føremålet.

Vanlege forvaltningsoppgåver som informasjon, tilrettelegging og rydding er derimot med i denne forvaltningsplanen.

Innspel:

Etter at planframlegget vart lagt ut til høyring har SNO føreteke ei kartlegging av gran i reservatet med omsyn til å planlegga uttak av gran frå anna avstamming enn den ein finn i skogateigen. Eit oversynskart frå rapporten vert føreslege lagt inn som vedlegg.

Sogn og Fjordane fylkeskommune har gjeve ei kulturminnefagleg fråsegn til planen i samband med høyringa. Her oppmodar dei til ei noko meir detaljert kartlegging av kulturminna i reservatet enn det som var lagt opp til i framlegget. Rådmannen meiner at innspelet er nyttig, og har skrive om avsnitt 6.3 for å få med dei ekstra momenta.

Det kom ingen andre innspel.

Konklusjon:

Rådmannen meiner at planen med dette er tilstrekkeleg gjennomarbeida til å verta send til slutthandsaming hjå Fylkesmannen etter handsaming i kommunestyret. Den ferdige planen vil verta eit nyttig verkty i forvaltninga av naturreservatet i åra framover.

Dato: 29.05.17

Jarle Skartun
rådmann

Steinulf Skjerdal
Landbruksjef

Særutskrift skal sendast: Fylkesmannen i Sogn og Fjordane, miljøvernavdelinga
m/kopi til:
Sogn og Fjordane fylkeskommune
SNO Luster v/Liv Byrkjeland